


CHINESE-JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE
SEP 15 1933

T152/4037



晉安鄭肇修訂

石齋先生經傳九種

¹⁻³孝經集傳

²¹⁻²³洪範明義

³⁰月令明義

¹⁻⁴易象正

²⁴⁻²⁷表記集傳

³¹⁻³⁴緇衣集傳

¹⁵⁻²⁰三易洞璣

²⁷⁻²⁹坊記集傳

³⁵⁻³⁶儒行集傳

石齋先生經傳九種
孝經集傳
洪範明義
月令明義
易象正
表記集傳
緇衣集傳
三易洞璣
坊記集傳
儒行集傳

孝經集傳序

今上登閔化理敦尚儒術
承

世祖章皇帝之志

命儒臣纂修孝經衍義刊

布海內俾窮鄉末學
華戶陋民咸曉然於
至德要道天經地義
之大德至渥也屬在
內外臣工其誰敢不

虔奉

聖訓務令家喻戶曉以躋
淳風况學臣之模範
士類輩蒞黌宮而以
明倫正俗爲職者哉

鄭公肇修夙推闡中
碩望以木天之選視
學兩浙既造多士而
衡其文藝定其高下
以示激勸吏念有文

矣或無行則馬牛而
襟裾可奈何且士有
百行惟孝爲先故昔
賢以事君忠蒞官敬
居處莊戰陣勇舉而

悉歸之孝因取石齋
黃氏所著孝經集傳
鏤版以行欲凡列于
郡邑諸庠者人人知
溫清定省之節立身

揚名之義庶幾乎經
明而行修不徒以浮
華相尚也或以

朝廷所頒衍義一書煌煌
義類炳若日星外此

者難爲言矣茲復爲
黃氏集傳之刻是日
月出而燭火不息時
雨降而浸灌不已其
無乃近于綴旒乎此
其說然矣而亦不盡
然古之治天下者家
有塾黨有庠州有序
國有學其在上之后
王君公旣躬行以率

之矣以爲率之或不
徧也又設立師儒以
教之周禮所謂師以
賢得民儒以道得民
者是也以爲教之或
不從也於是有訓典
以閑之周禮所謂十
有二教保息六本俗
六及鄉三物云云是
也以爲閑之或有頑

梗桀驚而不馴也則
又有刑威以糾之周
禮所謂八辟三刺及
園土嘉肺之石是也
又恐遐陬僻壤蔀屋
窮簷之衆猶有未能
盡曉者則於治和之
布象魏之懸之於爲
道人木鐸以徇于道
路何其法之詳而備

教訓之有加而無已
歟蓋其立教之本不
越于家庭庸行之近
而其所以教之之方
則愈多焉而不苦其
煩屢悉焉而不厭其
瑣今

聖主在上既以孝經頒示
各省矣而爲臣子者
奉行而遵守之固對

揚之誼也卽或旁摻
 而廣述之尤旬宣之
 分也且夫孝之爲道
 也天子曰就諸侯曰
 度卿大夫曰譽士曰
 究庶人曰畜推而放
 之東海而準推而放
 之西海而準推而放
 之南海而準推而放
 之北海而準豈以貴

賤遠近而有異乎哉
黃氏爲肇修之鄉先
生學術淵通文詞宏
偉不幸生于明季以
正直自守不能媚權
貴而數遭斥辱然其
言其行見于通紀諸
編有不媿移孝成忠
之目者夫以楊子雲
之法言馬季長之忠

經後之君子猶不以
人而廢之况於黃氏
之大節凜凜者哉予
之有取于肇修之刻
猶之肇修之有取于
黃氏之傳也學者由
是而進以求之於

上頒之衍義其亦行遠自
邇登高自卑之意也
夫

皆

康熙三十二年歲次

癸酉孟夏月朔

賜進士出身巡撫浙江等

處地方提督軍務都

察院右僉都御史遂

寧張鵬翮謨

孝經集傳序

今

天子以孝治天下

詔儒臣纂修孝經衍義炳然

天經垂地義著矣

極

承

乏宮諭奉

命視學兩浙思以宏孝理者
敦士行翼經傳者贊

聖學惴惴焉懼不克勝任竊
聞鄉先正石齋黃公考

注經傳其功甚偉而孝
經集傳一書尤稱醇備
乃後學未之獲睹也海
寧沈昭子先生著書明
道以微言陸緒爲已任

一日削札遠及奉是編
寫本見貽爰拜受以莊
誦焉分經別傳則朱考
亭之刊誤也次第篇章
則劉中壘之今文也儀
禮二戴記以爲疏義則
六家之同異可無論也
小傳則公之所發明大
傳則兼採游夏思孟之
所闡述也微義五著義

十二則公之自序其節目也旨該而義切其爲集傳也若是至德要道不粹然明備也耶夫公之經學其所考注亦博矣聞其書有傳有不傳不傳者如詩晷正春秋表正放失舊聞良足慨已其傳者網羅搜訪不得之於閩而得之於浙

既得之於蓬山藜閣之
家更得之於汲古問奇
之士噫延津之合抑何
神也又其幸已極乃得
蠡測而徧窺其領要焉
有若易象正三易洞璣

及洪範月令二篇之明
義公蓋精于天人象數
之學者也易與範天人
象數之所自出而月令

則其占驗焉者也于斯
三者能通貫焉以視焦
京之於易向之於洪範
邕之於月令較之漢儒
抑遠矣有若緇衣儒行

暨坊表二記均名之曰
集傳夫禮四十九篇其
綴拾不無醇雜固紫陽
之所欲刪正草廬之所
欲詮次者也茲四篇者

醇乎孔子之言也公所
謂自二十篇而外未有
明著于此者其爲之考
注也宜詳以視張九成
之于少儀楊簡之于孔
子閒居較之宋儒抑又
微矣然則公之經學蓋
不止于孝經也雖然孔
子嘗贊易述書刪詩定
禮樂修春秋矣當其時

序
門弟子未有以經名者
至與曾子言孝子思樂
正子春之徒筆之于書
謂之孝經夫子亦云行
在孝經經之名蓋始于
此公以通經之義者尊
經之統必以是經冠六
經之首也明矣極論次
公之經學疏其大畧先
訂是編以鏤板焉而餘

有俟也是亦公之志也
夫公之在勝國也抗顏
殿陛反覆論諫九折不
回及其賦板蕩之什稍
稍委蛇亦可以鼓吹詞
林而不可奪也以視孔
安國王肅陸德明邢曷
諸家其行誼又何如也
耶然則傳孝經者惟公
斯無忝爾是編也以仰

贊

聖天子之孝治而敦士行翼

經傳非小補云

極

是以



發潛闡微而敬爲之序

皆

康熙三十一年歲次壬

申八月朔侯官鄭開極

撰



孝經集傳序

紫陽朱子以窮理之學致力於經傳集註五經四子書四百年來國家以之設科取士如漢世經師立於學官之比其孝經刊誤儀禮通解二書

以其非宗伯所頒藏書家用
備故籍而已刊誤之作因文
刪定無所增加嘗欲掇取他
書之言別爲外傳以發此經
之義而自謂未敢蓋若有待
焉晚歲修明三禮則以儀禮

本爲禮經若二戴記及諸經
史雜書所載有及於禮者各
附本經之下惟喪祭二禮未
就屬門人黃幹續成之明季
漳海黃石齋先生紹明紫陽
之意成孝經集傳一書謂六

經之本皆出孝經而儀禮二
戴記皆爲孝經疏義他若游
夏諸儒及子思孟子所傳亦
備採之謂之大傳經傳各條
之下先生以窮理所得暢厥
發明謂之小傳此紫陽修儀

禮之成法也大傳字目二萬
餘小傳五萬餘起艸於崇正
戊寅卒業癸未鰲然大成非
若紫陽儀禮喪祭之有遺憾
也竊窺先生生平之學行孝
爲本孝弟之義愛敬爲本以

之修身以之。事君卽以之。惠
教學者所見明而所守確。故
條次遺文。抉陳精理。罔勿深
切著明。其言曰。語孝則本敬
本敬則禮。從此起。斯言也。揭
道德之根柢。溯經曲之大原。
正天心而立民命。舉括諸此
矣。於是繹爲微義五。著義十
二。謂著是十七者。以治天下
選士不與而士出其中。今按
二傳之所指列。一以是十七
者爲之綱領。精麤本末綜貫。

靡遺以達乎敬愛之本然誠
使士出其中而任天下之重
安有不本仁陳義使天下奏
中和祥順之治也哉夫孝治
天下經之所已言選士出其
中此先生洞灼三才綱維百
行而獨見乎從前所未有宋
以前說經諸家大師或至數
十萬言往往沿數而昧理循
偏而忽全惟董江都說春秋
性功王道備焉宋諸大儒則
濂溪通書伊川易傳紫陽四

子集註儀禮通解文富義該
羽翼六經語孟莫有能繼之
者先生此編揭日星而儷河
漢豈出諸先生下哉孝經顯
於漢亦淆雜於漢亂於隋緒
正於唐宋紫陽涑水指歸各

殊譬之世系宗傳則諸家皆
別子支庶而是編乃其宗子
百世者矣先生一生著述精
神義理畢萃此編然故本放
失罕復流傳珩向得刻本於
叔氏漳浦君愛若父母敬若

神明叩諸當代藏書家如寶
玉大弓之不及覩思鐫摹以
永其傳力澁未舉晉安 鄭
肇翁先生品望學行夙推

朝右今年來督學於浙知遺書不
泯急欲表見以惠學者甚盛

心也竊念

國家特崇孝經程士顧士習務華
絕根所沿綴應制不過影響
標撮幾若漢世孝廉至不能
名十八章篇目况夫愛敬之
本道德經曲之根原如漸盡

灰滅豈非學術世教之憂哉
將以正造士選士之大端而
使是編之垂法與漢宋諸大
儒羽翼經傳之功同彪炳千
秋均於今日竊厚幸焉謹繕
錄以備鈔行而爲之序其畧

云峇

康熙三十年歲次辛未仲夏
日後學海寧沈珩謨



孝經集傳目錄

第一卷

士開宗

天子庶人

諸侯凡六章

卿大夫

經凡一百十九字
小傳五百五字

傳大三百九十九字
小一千八百三十六字

經凡五十二字
小傳七百八十二字

傳大一千八十六字
小二千五百九十字

經凡七十四字
小傳三百一十五字

傳大七百八十三字
小一千五百四十八字

經凡八十七字
小傳三百三十三字

傳大九百八十一字
小一千二百五十三字

經凡八十四字
小傳二百八十三字

傳大一千二百七十一字
小二千一百三十一字

經凡四十三字
小傳三百三十字

傳大六百五十八字
小一千九百二十七字

第二卷

三才孝治

聖德

凡三章

經 凡一百二十九字 小傳四百三十三字 傳 大一千一百三十七字 小三千三百四十六字

經 凡一百四十二字 小傳六百三十五字 傳 大一千九百九十一字 小二千八百三十六字

經 凡二百八十四字 小傳二千一百二十五字 傳 大一千三百九十二字 小五千一百二十八字

第三卷

紀孝 凡四章

五刑 廣要道 廣至德

經 凡九十一字 小傳三百五十六字 傳 大二千七十九字 小三千二百三十字

經 凡三十七字 小傳三百八十五字 傳 大一千四百七十八字 小二千九百字

經 凡八十一字 小傳二百五十四字 傳 大一千九百五十三字 小一千六百三十一字

經 凡八十字 小傳二百一十字 傳 大一千三百一十字 小一千五百八十二字

第四卷

廣揚名 喪親

諫諍 凡五章

感應 事君

經 凡四十五字 小傳一百一十八字 傳 大九百八十二字 小一千二百五十二字

經 凡一百四十三字 小傳七百九十四字 傳 大五百一十七字 小一千一十一字

經 凡一百九十字 小傳五百二十五字 傳 大一千二百七十八字 小三千三百六字

經 凡四十九字 小傳五百四十四字 傳 大七百五十六字 小一千六百七十一字

經 凡一百四十二字 小傳一千三百二十五字 傳 大二千四百四十四字 小二千六百九十四字

通計

經 凡一千七十八章 小傳一千七百九十一字

大傳 凡二萬二千四百九十八字

小傳 凡三萬一千七百七十七字

共得七萬四千四百六十六字

孝經集傳卷之一

黃道周集傳後學

晉安鄭開極館珍藏印

開宗明義章第一

海昌沈珩 全較

仲尼居曾子侍子曰先王有至德要道以順天

下民用和睦上下無怨女知之乎

順天下者順其心而已天下之心順則天下皆順矣因心而立教謂之德得其本則曰至德因心而成治則曰道得其本則曰要道道德之本皆生於天因天所命以誘其民非有強於民也夫子見世之立教者不反其本將以天治之故發端於此焉

曾子曰參不敏何足以知之

子曰夫孝德之本也教之所繇生也

本者性也教者道也本立則道生道生則教立先王以孝治天下本諸身而徵諸民禮樂教化於是出焉周禮至德以為道本敏德以為行本孝德以知逆惡雖有三德其本一也

復坐吾語女

身體髮膚受之父母不敢毀傷孝之始也立身

行道揚名于後世以顯父母孝之終也

教本於孝孝根於敬敬身以敬親敬親以敬天仁義立而道德從之不敢毀傷敬之至也為天子不毀傷天下為諸侯大夫不毀傷家國為士庶不毀傷其身持之以嚴

守之以順存之以敬行之以敏無怨於天下而求之於身然後其身見愛敬於天下身見愛敬於天下則天下亦愛敬其親矣故止教者終始於此也

夫孝始于事親中于事君終於立身

始上事親道在於家中于事君道在天下終下立身道在百世為人子而道不著於家為人臣而道不著於天下身歿而道不著於百世則是未嘗有身也末嘗有身則是未嘗有親也天子之事天亦猶是矣詩曰我其夙夜畏天之威于時休之保身之與保天下其義一也

大雅云無念爾祖聿修厥德

德修則道立道立則名成君子之修德不為名也書曰七世之廟可以觀德君子一

不敬而墜七世之廟毀傷一人而毀及百世之宗詩曰商之孫子其麗不億上帝既命侯于周服君子敬身如敬天周家三世皆有孝德乃命於天武王數紂之罪曰謂已有一天命謂敬不足行謂祭無益謂暴無傷其道正反故君子修德敬身之為貴也

右經第一章

凡一百一十九字

孝經舊本凡十八章一千七百七十三字所以誕值五經綱紀萬象也石基本皆依劉向所較河間獻王得於顏芝者獨標題幾殊耳近儒皆疑四孝俱有引詩而庶人獨否似有闕文又聿修之義大雅所告天子無忝之詠小宛以勗庶民欲移大雅以發天子之端推無忝以起庶民之例於說亦通然於首章文義未終於過節發端多礙小宛之賦雖通於庶人有慶之義反疎於侯國又攷匡衡論政治疏中稱聿修厥

德孝經引為首篇則自匡衡而上韓嬰疏廣皆然不必劉向矣凡孝經之義不為庶人而發其自舜文而下獨推周公以愛敬為道德之原豫順為禮樂之實雖曾子論孝十章未有能闡其意者蓋曾子之微言授於子思而中庸之精義發於孟子游夏之徒微分敬養以弘禮樂之施曲臺諸儒兼採質文以收道德之委至其精義備在孝經舜文復起無所復易也劉炫繆以閨門之語濶於聖經朱子誤以聖人之訓自分經傳必拘五孝以發五詩則厥失維均去古愈遠矣

大傳第一

凡傳皆以釋經必有旁引出入之言孝經皆曾子所愛夫子本語不得自分經傳而游夏諸儒所記曾子孟子所傳實為此經羽翼故復備採之以溯淵源云

子曰君子無不敬也敬身為大身也者親之
 枝也敢不敬與不能敬身是傷其親傷其親
 是傷其本傷其本枝從而亾

不敢毀傷厚其本也有子曰君子務本大
 學曰其本亂而未治者否矣然則毀傷何
 謂也曰暴棄之謂也孟子曰言非禮義謂
 之自暴吾身不能居仁由義謂之自棄也
 暴棄其身則暴棄其親膚髮雖存有甚於
 毀傷者矣詩曰各敬爾儀天命不又

子曰君子言不過辭動不過則百姓不命而
 敬恭如是則能敬其身能敬其身則能成其
 親矣

言動不過百姓敬恭百姓之於君子亦猶
 之膚髮也君子以天下為身體百姓為膚
 髮怨惡生於下則毀傷著於上和睦無怨
 則百體用康周書曰若德裕乃身不廢在
 王命又曰嗚呼小子封桐瘵乃身敬哉是
 之謂也

子曰君子也者人之成名也百姓歸之名謂
 之君子之于是使其親為君子也是為成其
 親之名也已

親之愛子不為其身之名也而子毀其名
 則親傷其身幽厲之於文武有餘恫者矣
 書曰恐人倚乃身迂乃心予迂續乃命于
 天是先王之仁也

子曰古之為政愛人為大不能愛人不能有

其身不能有其身不能安土不能安土不能樂天不能樂天不能成其身

易曰樂天知命故不憂安土敦乎仁故能愛不安土則不敦仁不樂天則不知命不敦仁不知命不有人既則有天刑詩曰敬之敬之天維顯思命不易哉無曰高高在上所以教成身者也

哀公問曰敢問何為成身孔子對曰不過乎物仁人不過乎物孝子不過乎物是故仁人

之事親也如事天事天如事親是故孝子成

身

物者人之所生也天之生物使之本身體髮膚家國天下皆物也其本則皆性也能盡其性則能盡人之性能盡人之性則能盡物之性三德六行脩於身三事六府脩於外不過乎物不遠乎身皆親也則皆天也天子事天士庶事親其本於誠敬純一不已則一也子白舜其大孝也與德為聖人尊為天子富有四海之內宗廟享之子孫保之故大德必得其位必得其祿必得其名必得其壽故天之生物必因其材而篤焉夫舜而有過物乎哉舜亦成物而已成物則成親成親則成天而成身也故如舜而後為成身者也

哀公曰敢問何貴乎天道也孔子對曰貴其不已如日月東西相從而不已也是天道也

不閉其久是天道也無爲而成是天道也已
成而明是天道也

天道者何誠之謂也誠以成已誠以成物誠者敬也不敬則無終始無終始則無物無物則無親無親則無天詩曰天生蒸民有物有則中庸曰誠者自成也而道自道也誠者物之終始不誠無物仁人不過乎物孝子不過乎物敬以成始敬以成終日月東西起而相從詩曰維天之命於穆不已於乎不顯文王之德之純如文王則所謂純孝者也

公明儀問於曾子曰夫子可謂孝乎曾子曰
是何言與是何言與君子之所謂孝者先意

承志喻父母於道參直養者也安能孝乎身
者親之遺體也行親之遺體敢不敬乎故居
處不莊非孝也事君不忠非孝也蒞官不敬
非孝也朋交不信非孝也戰陣無勇非孝也
五者不遂災及其身敢不敬乎

曾子之告公明儀亦猶夫子之告子游也五者不遂毀傷其身五者而遂亦毀傷其身則曾子奚取之乎曰吾取其敬者而已祭而受福戰而必克遜言危行吾未見夫忠君勇戰而死者矣死而無所毀傷則猶之成身者也曰其道存焉爾

曾子曰君子之所謂孝者國人皆稱願焉曰

幸哉有子如此所謂孝也父母既歿慎行其身不遺父母惡名可謂能終也夫仁者仁此者也義者宜此者也忠者中此者也信者信此者也禮者體此也行者行此者也疆者強此者也樂自順此生刑自反此作

七德者皆敬也慎行其身不遺惡名非惡其聲而然也國人稱願有子如此非要譽而為之也遠刑而近名遠名而近刑君子則皆不為也君子慎行而已慎行則近於道矣然則曾哲未為不道也而曾子自謂諡親未能何也曰曾子揚親者也曾子以言行遜其親先意承志則有所未逮也詩曰教誨爾子式穀似之曾子之謂也

曾子曰君子甌之為患辱之為畏見善恐不得與焉見不善恐其及已也是故君子疑以終身

立身行道何疑之有疑而後思思而後有終詩曰永言孝思孝思維則

曾子曰言不遠身言之主也行不遠身行之本也言有主行有本謂之有聞矣君子尊所聞則高明矣行所知則廣大矣高明廣大無它在加之意而已矣

加意無它曰敬慎而已君子之言如吹篪其出之益細則聞之益遠行如集木其處

二愈高則視下滋懼矣毀傷之言曾子勿
身焉曾子豈有近於刑名者乎曰吾之所
知所聞不過如此而已

曾子曰人言不善而不違近於說其
言始於以身近之也始於以身近之始於身
之矣人言善而色蔥焉近於不說其言不說
其言始於以身近之也始於以身近之始於
身之矣

身於為不善者君子不入也始於不善則
亦幾始矣以是立身猶未至於行道也而
道本諸身恆必繇之書曰乃奉其恻汝悔
身何及是曾子所謂終身守此惓惓也

曾子曰孝子不登高不履危痺亦弗馮不苟
笑不苟訾隱不命臨不指居易俟命不興險
以傲幸孝子游之暴人違之出門而使不以
或為父母憂也險途隘巷不求先焉以愛其身不
敢忘其親也

是循未至於行道也然不如是不足以行
道君子不外道而求身不外身而求道孟
子曰道在邇而求諸遠事在易而求諸難
人人親其親長其長而天下平又曰孰不
為事事親事之本也孰不為守守身守之
本也故如是則可謂知本者矣詩曰凡百
君子各敬爾身胡不相畏不畏于天敬親
之與敬天其致一也

樂正子春曰吾聞之曾子曾子問諸夫子曰
天之所生地之所養人爲大矣父母全而生
之子全而歸之可謂孝矣君子一舉足不敢忘
忘父母一出言不敢忘父母一舉足不敢忘
父母故道而不徑舟而不游不以父母之遺
體行始一出言不敢忘父母是故惡言不出
於口忿言不及於已然後不辱其身不憂其
親則可謂孝矣

是亦未至於行道也然至於道不行
者鮮矣爲天子者以天下全歸於天爲諸

侯者以社稷全歸其祖爲卿士者以祿位
全歸其君一言一行不忘其親久而後成
親成親而後成天而成天而後成道詩曰成
王不敢康夙夜基命宥密是之謂也

曾子曰草木以時伐焉禽獸以時殺焉吾聞
諸夫子斷一樹殺一獸不以其時非孝也

夫如是則可謂不毀傷者矣不毀傷其身
以不殺傷萬物不毀傷天下虞書曰疇若
予上下草木鳥獸商書曰暨鳥獸魚鼈咸
若盡人盡物之性參贊天地則亦庶乎此
也孟子曰人皆有不忍人之心先王有不
忍人之心斯有不忍人之政以不忍人之
心行不忍人之政天下可運於掌上故
曰天子者天之孝子也孝子事親仁人事
天不過乎物則亦曰時而已時者天地所
爲大順也詩曰孔惠孔時維其盡之子子

孫孫勿替引之

右傳十四則大傳三百九十九字
小傳一千八百三十六字

天子章第二

子曰愛親者不敢惡於人敬親者不敢慢於人

愛敬盡於事親而德教加於百姓刑於四海蓋

天子之孝也

天子者立天之心立天之心則以天視其親以天下視其身以天視親以天下視身則惡慢之端無繇而至也故愛敬者禮樂之本中和之所繇立也惡人以惡其親慢人以慢其親則雖庶人不為也夏書曰予視天下愚夫愚婦一能勝予一人三矣

甫刑云一人有慶兆民賴之

豈在明不見是圖予臨兆民凜乎若朽索之馭六馬為人上者柰何不敬敬者愛之實也愛敬盡於事親而惡慢消於天下惡慢不生中和乃致不言德教而德教盡於是詩曰惠于宗公神网是怨神网是恫刑于寡妻至于兄弟以御于家邦是之謂也

易曰來章有慶譽吉慶譽皆孝也皆福也天子以孝事天天以福報天子兆民百姓

則其膚髮也又何不利之有賈生曰三代之禮天子春朝朝日秋暮夕

月所親饋之明有敬也春秋入學坐國老執醬

而親饋之明有敬也春秋入學坐國老執醬

采齊趨中肆夏所以明有度也其於禽獸見其生不忍見其死聞其聲不忍食其肉故遠庖厨所以長恩且明有仁也食以禮徹以樂失度則史書之工誦之三公進而

讀之宰夫減其膳是天子不得為非也明
 堂之位曰篤仁而好學多聞而道慎天子
 疑則問應而不窮者謂之道道者道天子
 以道者也常立於前是周公也誠立而敢
 斷輔善而相義者謂之充充者充天子之
 志也常立於左是太公也潔廉而切直匡
 過而諫邪者謂之弼弼者拂天子之過者
 也常立於右是召公也博聞而強記捷給
 而善對者謂之承承者承天子之遺忘者
 也常立於後是史佚也故成王中立而聽
 朝則四聖維之是以慮無失記而舉無過
 事殷周之所以長久者以其輔翼天子有
 此具也及秦而不然其俗固非貴辭讓也
 所尚者告訐也固非貴禮義也所尚者刑
 罰也故趙高傳胡亥而教之獄所習者非
 斬劓人則口人之族也故今日即位而明
 日射人忠諫者謂之誹謗深計者謂之妖
 言其視殺人若刈草菅然豈胡亥之性惡

哉其所習道之者非其理故也存亡之變
 治亂之機其要盡在是矣天下之命懸於
 太子太子之善在於蚤諭教與選左右夫
 胡越之人生而同聲嗜慾不異及其長而
 成俗也彙數譯而不能相通臣故曰選左
 右蚤諭教最急夫教得則左右正則太子
 則太子正太子正而天下定矣書曰一人
 有慶兆民賴之記曰一人元良萬邦以貞
 賈生之言未及於教孝也然於愛敬之義
 則近矣

右經第二章 凡五十二字 小傳七百八十二字

大傳第二

子曰立愛自親始教民睦也立敬自長始教
 民順也教以慈睦而民貴有親教以敬長而

民貴用命孝以事親順以聽命錯諸天下無

所不行

商書曰立愛惟親立敬惟長始於家邦終於四海此愛敬之始教也記曰致愛則存致慤則著著存不忘乎心此愛敬之本事也聖人而以性教天下則舍愛敬何以矣愛敬者禮樂之所從出也以禮樂導民民有不敬者禮樂以愛敬導民民乃不沿其流故愛敬者德教之本也舍愛敬而談德教是霸主之術非明王之務也

孟子曰人之所不學而能者其良能也所不慮而知者其良知也狹提之童無不知愛其親也及其長也無不知敬其兄也親親仁也

敬長義也無它達之天下也

仁義者德教之目也德教者敬愛之目也語其目則有仁義禮智慈惠忠信恭儉語其本則曰愛敬而已天有五行著於星辰而日月為之本曰是生敬月是生愛敬愛者猶今日地所為日月也治天下而不以愛敬

然則孩提之童有稍長而不知愛敬者何也曰其習也非性也其所養之者非道也

賈生曰春秋之元詩之關雎禮之冠婚易之乾坤皆慎始敬終云耳素成謹為子孫婚嫁必擇孝悌世世有行義者如是則其子孫慈孝無淫暴不善故曰鳳凰生而有

仁義之意虎狼生而有貪戾之心兩者不
等各以其母嗚呼戒之哉無養乳虎將傷
天下故曰素成胎教之道青史之記曰占
者胎教之道王后身之七月而就蓂室

太師持銅而御戶左太宰持斗而御戶右
太卜持著龜而御堂下諸官皆以其職御
於門內此三月者王后所求聲音非禮樂
則太師撫樂而稱不習所求滋味非正味
則太宰荷斗而不敢煎調太子生而泣太
師吹銅曰聲中某律太宰曰滋味上某太
卜曰命云其然後為王太子懸弧者東方
之弧以梧梧者東方之草春木也其牲以
雞雞者東方之牲也南方之弧以柳柳者
南方之草夏木也其牲以狗狗者南方之
牲也中央之弧以桑桑者中央之木也其
牲以牛牛者中央之牲也西方之弧以棘
棘者西方之草秋木也其牲以羊羊者西
方之牲也北方之弧以棗棗者北方之草
冬木也其牲以麋麋者北方之牲也五分
五分矢四方皆三射四弧其餘各二分矢
懸諸國四通門之左中央之弧亦餘二分
懸諸社稷門之左然後卜王太子名上毋

取於天下毋取於地中毋取於名山通谷
毋停於鄉俗是故君子名難知而易諱也
此所以養息之道也周后妃妊成王立而
不跛坐而不幾笑而不諠獨處而不侶雖
怒而不詈胎教之謂也成王生仁者養之
孝者襁之四賢傍之成王有知而前有與
計後有與慮也若是以為人子而後知所
至矣故曰知所以為人子而後知所以為
人父也知所以為人臣而後知所以為人
兄也知所以為人君也射者各射已之鵠
也射者各射已之鵠亦本於此也故不知
教之義者則亦不可以立性矣

孟子曰愛人不親反其仁治人不治反其智
禮人不答反其敬行有不得者皆反求諸已
其身正而天下歸之

孟子曰君子之所以異於人者以其存心也君子以仁存心以禮存心仁者愛人有禮者敬人愛人者人恆愛之敬人者人恆敬之有人於此其待我以橫逆君子必自反也曰我必不仁自反也曰我必無禮也自反是也君子必自反也曰我必無禮也自反而有禮矣其橫逆猶是也曰我必不忠是故君子有終身之憂無一朝之患也乃若所憂則有之舜人也我亦人也舜為法於天下可傳於後世我猶未免為鄉人也是則可憂也憂之如何如舜而已矣夫舜非敬愛其親不惡悞天下而能使天下愛敬之如此乎

孟子曰天下大悅而將歸已視天下悅而歸已猶草芥也惟舜為然不得乎親不可以為

人不順乎親不可以為子舜盡事親之道而瞽瞍底豫瞽瞍底豫而天下化為瞽瞍底豫而天下之為父子者定

古之以孝德而王天下者莫舜若也舜之愛敬盡於事親而德教加於百姓刑於四海自愛敬而外舜亦無所事也曰以吾之愛敬萃萬國之懽心若此而已

修政之記曰帝舜曰吾盡吾敬以事吾上故見為忠焉吾盡吾敬以接吾敵故見為信焉吾盡吾敬以使吾下故見為愛焉是以見愛親於天下之民而見貴信於天下之君故吾

取之以敬也吾得之以敬也

愛者敬之情也敬者愛之志也非志無情非敬無愛故以一敬而教忠教順教仁教讓是文王之學之所從出也詩云穆穆文王於緝熙敬止子曰為人君止於仁為人臣止於敬為人父止於慈為人子止於孝與國人交止於信文王之五止則自敬始也文王為世子朝于王季日三雞初鳴而衣服至於寢門之外問內監曰今日安否內監曰安文王乃喜日中至如之日莫至亦如之有不安節內監以告文王色憂行不能正履王季復膳然後復初食上必在寒煖之節食下問所膳然後復初食上必在節然後還文王之卑服田功懷保小民惠鮮鰥寡亦循此志也文王以其敬而為人君故見為仁焉以其敬而為人父故見為慈焉以其敬而接國人故見為信焉故文

王者得大舜之志者也然則孝經之稱周公不稱大舜何也曰舜君道也天道也周公臣道也子道也弟道也周公於臣弟益二焉故尊舜而親周公然則舜之饗宗廟係子孫何也曰郊廟異義國天下異制以聖人視之法於天下垂於後世與郊父傳子者蓋未有以異也故文王者得大舜之志周公者得大舜之事也

子言之君子之所謂義者貴賤皆有事於天下天子親耕粢盛秬鬯以事上帝故諸侯勤以輔事天子

然則天子親耕粢盛亦自舜始與曰郊禘之義皆不自舜始也耕藉視學蓋亦猶是也凡惡慢之生皆生於無事有事而後愛敬生愛敬之始事為天子耕籍田王后織

玄統夫婦有事以致孝於天地宗廟及其
 終事諸侯大夫合愛合敬以薦助天子於
 是有朝聘燕享貴貴老老長長幼幼之務
 故言愛敬之典者必始於耕藉中於齒胄
 終於養老詩曰假以溢我我其收之駿惠
 我文王曾孫篤之是孝經之行事與春秋
 俱始也

昔者天子為籍田千畝晁而朱紘躬秉耒諸
 侯為籍百畝晁而青紘躬秉耒以事天地山
 川社稷先古以為醴酪粢盛於是乎取之敬
 之至也

天子耕其籍田三推一墾諸侯而下以次
 加等寡人終之白是天子不賤五穀不多

取田賦不惡慢胼胝之士謂是天地山川
 社稷先古之手澤力食存焉耳

昔者天子諸侯必有養獸之官及歲時齊戒
 沐浴而躬朝之犧牲祭牲必於是取之君召
 牛納而視之擇毛而上之吉然後養之君皮
 弁素積朔月半巡牲所以致力孝之至也

天子諸侯皆躬視牲巡擇十吉自是天子
 卜濫取禽獸知萬物嘉惡登耗不惡惕川
 虞林麓之士謂是天地山川社稷先古之
 歆享孳育存焉耳

昔者天子諸侯必有公桑蠶室近川而為之
 築宮仞有三尺棘墻而外閉之大昕之朝君

皮弁素積卜三官夫人世婦之吉者入蠶室
 奉種浴于川桑于公桑風戾以食之歲單世
 婦卒蠶奉繭以告于君遂獻繭于夫人夫人
 副禕受之少牢以禮之及良日夫人繅三盆
 手遂布于三官夫人世婦之吉者使繅遂朱
 綠玄黃之以爲黼黻文章服既成君服以祀
 先王先公敬之至也

王后夫人皆躬蠶桑經織紘縵以供祭服
 自是天子知杼軸艱難女紅勞勩不敢惡
 慢韋布麻枲之士謂是天地山川社稷先
 古之服物章米存焉耳

卜郊受命於祖廟作龜於禰宮尊祖親考之
 義也卜之日王立於澤親聽誓命受教諫之
 義也郊之祭也喪者不敢哭凶服者不敢入
 國門敬之至也

天子以天事其親諸侯不敢祖天子大夫
 不敢祖諸侯恐有踰等以惡慢其上天子
 又推天親之意以敬禮其諸侯大夫曰是
 皆天之所生親之所命者因之以爲燕享
 勞與故自庶人而上亦皆有享帝享親之
 意是分天子之慶譽者也

祭之日君牽牲稷答君卿大夫序從既入廟
 門麗于碑卿大夫袒而毛牛尚耳鸞刀以割

取腍膋乃退爛祭祭腥而退敬之至也

天子致愛其親則致敬於物親射牲袒割詩曰維羊維牛維天其右之又曰自堂徂基自羊徂牛醵鼎及禽夫以為牛羊則何貴之有以謂是天子所射射袒割巡禮而致之則是其愛敬也至矣詩曰執其鸞刀以啓其毛取其血膋是非獨卿大夫之事也蓋自是天子而下庶民而上無有惡慢及於禽獸者

天子巡狩諸侯待于竟天子先見百年者八

十九十者東行西行者弗敢過西行東行者

弗敢過欲言政者君就之可也

天子愛親則愛其近於親者敬親則敬其近於親者耄悼不刑七十而上有過則微

矣雖多忘則亦聞知矣且其子姓多在也天子而有惡慢不使老者見之蓋自是諸侯卿大夫無有惡慢及於笑寡者

天子設四學當入學而太子齒食三老五夏

松太學天子袒而割牲執醬而饋執爵而醕

冕而摠干立於舞位

天子謂不逮養其親也而養三老五夏曰使天下皆養其親則是天子之養其親也天子既養其老則太子必齒其胄齒胄者更老之始也詩曰維桑與梓必恭敬止靡瞻非父靡依非母是之謂也

凡三王養老皆引年八十者一子不從政九

十者其家不從政瞽亦如之凡父母在子雖
 老不坐有虞氏養國老于上庠養庶老于下
 庠夏后氏養國老于東序養庶老于西序殷
 人養國老于右學養庶老于左學周人養國
 老于東膠養庶老于虞庠虞庠在國之西郊
 國老庶老皆老也文王善養天下皆歸之
 謂其有欲愛之實焉武王數紂之罪曰力
 行無度播棄黎老謂其有惡慢之實焉惡
 慢及於一人則怨恫起於百姓微子曰乃
 罔畏畏嗚其耆長殷周之間治亂之所繇
 分也可不慎乎

昔者有虞氏貴德而尚齒夏后氏貴爵而尚

齒殷人貴富而尚齒周人貴親而尚齒虞夏

殷周天下之盛王也未有遺年者年之貴乎

天下久矣次乎事親者也

天子而致力於事親則舍養老何舉乎天子負宸而立先朝之公卿則多耄年者矣其大夫士則多耆艾者也而天子以惡慢獨聞將敬其所敬而愛其所愛則先世之臣無有存者入廟愾然何以事其親大雅之終篇曰嗚呼哀哉維今之人不尚有舊

凡養老五帝憲三王有乞言五帝憲養氣體

而不乞言有善則記之為惇史三王亦憲既

養老而後乞言亦微其禮皆有惇史

乞言之禮微謂不敢以煩長者而猶且乞之敬之至也霸者之乞以煩長者而猶且乞之敬之至也

言猶曰毋使吾君得罪於羣臣百姓而况於王者乎詩曰雖無老成人尚有典刑板

之詩曰匪我言耄爾用憂譖周書曰法人維重老重老維寶

曾子曰孝子之養老也樂其心不違其志樂其耳目安其寢處以其飲食忠養之孝子之

身終是故父母之所愛亦愛之父母之所敬亦敬之至于犬馬盡然而况人乎

養老之於養親一也中庸曰敬其所尊愛其所親事死如事生事亡如事存孝之至也夫父母所敬愛敬愛之其不可敬愛如之何曰不敢惡慢焉已矣曾子曰可人也

吾任其過不可人也吾辭其旤又曰父母勿將為善思貽父母令名必果將為不善思貽父母羞辱必不果孝子之愛敬亦貽親以令也焉有不令而貽其親者乎詩曰媚茲一人應侯順德永言孝思昭哉嗣服

右傳十六則大傳一千八十六字小傳二千五百九十字

諸侯章第三

在上不驕高而不危制節謹度滿而不溢高而不危所以長守貴也滿而不溢所以長守富也富貴不離其身然後能保其社稷而和其人民蓋諸侯之孝也

諸侯受命于天子天子受命於天故天子之於天諸侯之於天子其事之皆如子之事親也周頌曰來見辟王曰求厥章言其制度出於天子非諸侯所得自與也夫以天子不敢惡慢於人以諸侯而驕溢則配適隨之矣諸侯之有耕籍蠶桑泮宮庠序宗廟社稷人民道皆侔於天子其稍殺者謹節之耳諸侯而不謹節猶支庶子之僭濫於父祖也商頌曰不僭不濫不敢怠遑是則庶乎可言愛敬者矣

詩云戰戰兢兢如臨深淵如履薄冰

甚矣諸侯之危也為人子而負驕寵又遠於膝下則其危也不亦互乎故臨淵履薄者諸侯之學無以異於曾氏之學也曾子曰殺六畜不當及其親吾信之矣使民不以時失國則是以時失國吾信之矣殺六畜不當及親則是以時失國吾信之矣使民不以時失國則是以世無

世無可使者也刀鋸不敢加於六畜鞭笞不敢加於徒役則是無以國也無以國而猶得保和之業謂是天子之所有也商頌曰歲事來辟勿予禍適稼穡非懈是之謂也

右經第三章 凡七十四字 小傳三百一十五字

大傳第三

諸侯之於天子也比年一小聘三年一大聘

五年一朝天子五年一巡守歲二月東巡守

至於岱宗柴而望祀山川覲諸侯問百年者

就見之命太師敝詩以觀民風命市納賈以

觀民之好惡志淫好辟命典禮考時月定日
 同律量禮樂制度衣服以正之山川神祇有
 不舉者為不敬不敬者君削以地宗廟有不
 順者為不孝不孝者君紕以爵變禮易樂者
 為不從不從者君流革制度衣服者為畔畔
 者君討有功德於民者加地進律五月南巡
 守至於南嶽如東巡守之禮八月西巡守至
 於西嶽如南巡守之禮十一月北巡守至
 於北嶽如西巡守之禮歸假於祖廟用持

不敬不孝不順天子所以致諸侯之討也
 天子五年一巡守諸侯將修其文以蓋其
 實或善事天子之左右內交於隣國則天
 子如之何曰其文之弊不勝其質之著也
 其君有驕志者則必有驕色有溢志者必
 有溢態驕志溢態達於面目見於左右
 近習者於田疇城郭雖什襲之固莫掩也
 且其權度衡量貢賦章物先告之矣而又
 有旱乾水溢勤民不勤民之務著於謠謠
 別於訟獄其社稷宗廟實載以白於天子
 故諸侯莫之掩也且使其可以文著則亦
 與為文焉耳文質之間天子所自反也頌
 曰無封靡于爾邦維王其崇之康誥曰往
 盡乃心無康好逸豫是則天子所自為愛
 敬也天子自為愛敬而諸侯敢於驕溢未
 之有也

天子將出類乎上帝宐乎社造乎禰諸侯將

出宐于社造于禰孔子曰諸侯適天子必告于祖奠于禰冕而出視朝命祝史告于社稷宗廟山川乃命國家五官而後行道而出告者五日而徧過是非禮也凡告用牲幣反亦如之諸侯相見必告于禰朝服而出視朝命祝史告于五廟所過山川亦命國家五官道而出反必親告于祖禰乃命祝史告至于前所告者而後聽朝而入

諸侯無故不出疆謂有宗廟社稷之世守焉焉朝于天子與諸侯相見則既有辭矣

觀魚觀社會婦人則何以命之為祝史者不已難乎然則魯之祝史無有執者何也曰終春秋之世兩如京師皆非正朝也而諸侯盟會歲或四五所過山川亦曰予知之矣愛其所愛敬其所敬愛非其所親敬非其所尊天子不得而慶讓之也春秋書公至自外者五十有九始于唐中於賊終於黃池傷於桓危於成喪於昭其未至也未嘗不汲汲之其至也未嘗不幾喜之謂其出而無可告於天子反而不可告於祖禰也且使其五官疲焉不知所從事則亦為天子失柄者之過矣

天子賜諸侯樂則以祝將之賜伯子男樂則以鼗將之諸侯賜弓矢然後征賜鈇鉞然後綬賜圭瓚然後為鬯未賜圭瓚則資鬯於天

子天子命之教然後為學小學在公宮南之

左大學在郊天子曰辟雍諸侯曰類宮

類宮之禮有以異於辟雍乎曰其釋奠於先老先師齒胄弦誦合語合樂養老養幼一也而憲乞異典矣詩曰載色載笑匪怒伊教又曰無小無大從公于邁是類宮慈而辟雍嚴也諸侯之於天子亦猶母之於父也將命以祝以黷何也祝終也黷始也分天子之養敬為四海之終始或曰祝從重節制之義也黷從輕鼓舞之意也

天子諸侯無事則歲三田一為乾豆二為賓客三為充君之庖無事而不田曰不敬田不以禮曰暴天物天子不合圍諸侯不掩羣天

子殺則下大綏諸侯殺則下小綏大夫殺則

止佐車佐車止則百姓田獵

諸侯無故不殺牛大夫無故不殺羊士無故不殺大豕庶人無故不食珍凡所以防人之驕危也一歲三田以習武事軍賓吉凶四禮合舉則在於田也田以殺而禦殺自四學而外三田為大訊馘之告於學則辨類同義也

子曰道千乘之國敬事而信節用而愛人使

民以時

其事則天子之事其用則宗廟社稷山川之用其人民則循先君之人民也而諸侯無創焉夫稱南面而常若子姓者其惟諸侯乎孟子曰諸侯危社稷則變置犧牲既

成塗盛既絜祭祀以時然而旱乾水溢則
 變置社稷遺老失賢培克在位雖成犧牲
 絜粢盛無以辭松水旱而獨以水旱咎之
 社稷何也曰是猶子之事親也無所改於
 怨怒而遠其居室變其飲食是亦一道也
 則甚矣為諸侯之危也以社稷事君又以
 社稷事天非極其愛敬而能保有此乎
 孟子曰諸侯之寶三土地人民政事實珠
 玉者殃必及身土地人民政事則天子先
 君之遺也珠玉則非天子先君之遺也雖
 遺之而愛敬之義不在也故曰君子之所
 異於人者以其存心也君子以仁存心以
 禮存心仁者愛人有禮者敬人是亦天子
 之志也詩曰維其有章矣是以有慶矣是
 亦孝子之事也
 孟子曰仁則榮不仁則辱今惡辱而居不
 仁是猶惡濕而居下也如惡之莫如貴德
 而尊士賢者在位能者在職國家闕暇及

是時明其政刑雖大國必畏之矣貴德尊
 士謂不惡慢於人者也不惡慢於人而後
 能尊賢而後能使能孝經之義未至於官
 人也以謂不愛不敬雖官人而有惡慢者
 存焉非仁人而能愛敬如此乎
 孟子曰萬乘之國弑其君者必千乘之家
 千乘之國弑其君者必百乘之家萬取千
 焉千取百焉不為不多矣苟為後義而先
 利不奪不饜未有仁而遺其親者也未有
 義而後其君者也仁者愛之質也義者敬
 之質也重仁義而輕富貴則愛敬之心殷
 重富貴而輕仁義則弑逆之旤著矣然則
 富貴不離其身何謂也曰身者父母之身
 也諸侯之富貴則其父母之仁也以父母
 之仁仁父母之身於諸侯奚有焉故不驕
 不溢君子之所貴也
 子曰貧而好樂富而好禮衆而以寧者天下

其幾矣詩云民之貪亂寧爲荼毒故制國不
過千乘都城不過百雉家富不過百乘以此
坊民諸侯猶有畔者

天下之畔亂則皆富貴之過也見夫茹蔬
躡躡而與篡弑者凡幾哉富貴而後驕溢
驕溢而後壞坊子曰丘也聞有國有家者
不患寡而患不均不患貧而患不安益均
無貧和無寡安無傾故和順者國家之福
也書曰和恆四方民居師和恆則愛敬愛
敬而時雍之化可冀也

子曰天無二日民無二王家無二主尊無二
上示民有君臣之別也春秋不稱楚越之王

喪禮君不稱天大夫不稱君恐民之惑也

爲諸侯而僭天子爲大夫而僭諸侯惡慢
長而愛敬衰易曰履霜堅冰至子曰臣弑
其君子弑其父非一朝一夕之故其所繇
來者漸矣繇辨之不蚤辨也蚤辨之非大
順而能之乎易初爲元士二爲大夫三爲
諸侯日大昕爲大夫食時爲諸侯日中爲
天子古之仁人孝子則必有辨於此者矣

子曰下之事上也雖有庇民之大德不敢有
君民之心仁之厚也是故君子恭儉以求役
仁信讓以求役禮不自尚其事不自尊其身
儉於位而寡於欲讓於賢卑已而尊人小心

而畏義求以事君得之自是不得自是以聽
 天命詩云莫莫葛藟施于條枚豈弟君子求
 福不回其舜禹文王周公之謂與有君民之
 大德有事君之小心

舜禹文王周公則可以為孝矣如舜禹文
 王周公之孝則可為諸侯師矣皇矣之詩
 曰維此四國爰究爰度上帝耆之增其式
 廓夫上帝之選子甚松天子諸侯之選子
 也而謂諸侯可以不學者已乎

右傳八則 大傳七百八十三字
 小傳一千五百四十八字

卿大夫章第四

非先王之法服不敢服非先王之法言不敢道
 非先王之德行不敢行

服者言行之先見者也未聽其言未察其
 行見其服而其志可知也仁人孝子一舉
 足不忘父母一發言不忘父母繇父母而
 師先王故有父之親有君之尊有師之嚴
 雖不言法而法見焉孟子曰子服堯之服
 誦堯之言行堯之行是堯而已矣子服桀
 之服誦桀之言行桀之行是桀而已矣夫
 非先王之車服言行而敢松服之不疑非
 桀紂而敢如此乎詩曰心之憂矣松我歸
 說

是故非法不言非道不行口無擇言身無擇行
 言滿天下無口過行滿天下無怨惡三者備矣

然後能守其宗廟蓋卿大夫之孝也

言而後世法之曰法行而天下繇之曰道孟子曰舜為法於天下可傳於後世夫豈有它曰孝而已孝子終日言不在尤之中終日行亦不在悔之中也子曰言寡尤行寡悔祿在其中矣無它慎之也詩曰豈弟君子干祿豈弟蓋其慎也易曰言行君子之所以動天地也可不慎乎

詩云夙夜匪解以事一人

卿大夫之事天子亦猶之事其親也而尊嚴倍之矣諸侯處優而卿大夫處劇公侯之得失邦國之治不治天子不責於諸侯而責於卿大夫故卿大夫之愛敬合於天下而後致於天子非仲山甫則未可語此也

右經節四章

凡八十七字小傳三百三十二字

大傳第四

子曰君子之道四丘未能一焉所求乎子以事父未能也所求乎臣以事君未能也所求乎弟以事兄未能也所求乎朋交先施之未能也庸德之行庸言之謹有所不足不敢不勉有餘不敢盡言顧行行顧言君子胡不慥慥爾

甚矣仁人孝子之多所不敢也行孝而不敢言孝則不敢言人之不孝者行仁而不

敢言仁則不敢言人之不仁者然則君子
 皆無所敢乎曰敢於為仁孝而已身為之
 而口不復言之故少過於已而寡怨於人
 然則伯夷叔齊之言行不及泰伯仲雍與
 曰其仁孝則一也天下之於夷齊何惡之
 有詩曰在彼無惡在此無斃庶幾夙夜以
 永終譽夷齊之謂也夫夷齊而有不顧之
 言行者乎雖無宗廟不毀其身

子曰仁之難成久矣惟君子能之君子不以
 所能者病人不以人所不能者愧人是故聖
 人之制行也不制以已使民有所勸勉愧耻
 以行其言是故君子服其服則文以君子之
 容有其容則文以君子之辭遂其辭則實以

君子之德君子耻服其服而無其容耻有其
 容而無其辭耻有其辭而無其德耻有其德
 而無其行

夫是則有耻矣可以言孝乎有耻而不可
 言孝則是孝者負耻也子貢曰不學其貌
 竟其德敦其言於人也無所不信其接夫
 人也常以皓皓是以眉壽是曾參之行也
 夫曾子壹至於此乎天下有道則卿大夫
 之選也

子曰長民者衣服不貳從容有常以齊其民
 則民德壹詩云彼都人士狐裘黃黃其容不
 改出言有章行歸于周萬民所望子曰為上

可望而知也為下可述而志也則君不疑於臣臣不惑於其君伊誥曰惟尹躬及湯咸有

一德

夫是則有恆矣可以言孝乎有恆而不可言孝則是孝無恆也易曰風自火出家人君子以言有物而行有恆仁人孝子不過乎物則是有恆之物也子貢曰夙興夜寐諷誦崇禮行不貳過稱言不苟是顏淵之行也在貧如客使其臣如藉不遷怒不探怨不錄舊罪是冉雍之行也夫顏冉之行壹至於此乎天下有道則卿大夫之選也

子曰王言如絲其出如綸王言如綸其出如綺故大人不倡游言可言也不可行君子弗

言也可行也不可言君子弗行也則民言不危行而行不危言矣詩云淑慎爾止不詈于

儀

夫是則淑慎矣可以言孝乎而見夫孝不淑慎者乎人臣而為王者之言傳之百世行之四方禮樂以成兵戎以興上下相危則亂離難平詩曰肅肅王命仲山甫將之邦國若否仲山甫明之子貢曰學以深厲以斷送迎必敬上爰下交銀手如斷是卜商之行也夫卜商則亦從事於此矣使之執筆故其德可頌也夫謂孝子之言唱游者乎

子曰苟有車必見其軌苟有衣必見其敝人

苟或言之必聞其聲苟或行之必見其成

夫是則庶乎无妄矣无妄可以言孝乎而見夫孝子多妄者乎虞書曰敷奏以言明庶以功車服以庸言功車服相稽而生所謂法也子貢曰先成其慮及事而用之是故不忘子言之欲能則學欲知則問欲善則訊欲給則豫是言儻之行也此五君子者聖門所謂孝子也壹未遇明主也

子曰言從而行之則言不可飾也行從而言之則行不可飾也故君子寡言而行以成其信則民不得大其美而小其惡詩曰允矣君子展也大成

夫是則庶乎成信矣成信可以言孝乎夫道至於成信而止矣子言之畏天而敬人服義而行信孝乎父而恭乎兄好從善而敦性益趙文子之行也其事君也不敢愛其死然亦不亡其身謀其身不遺其爰陳則進不陳則退益隨武子之行也其為人淵泉也多聞而難誕也不內辭足以勅世國有道其言足以生國無道其默足以成益銅鞮伯茲之行也是三君子者則嘗為卿士大夫至孝經之義末至於退默也而隨會伯華比有之益循之不毀傷之志也是聖人之所貴也

曾子曰君子博學而孱守之微言而篤行之行必先人言必後人君子終身守此悒悒行無求數有名事無求數有成身言之後人揚

之身行之後人秉之君子終身守此憚憚君子不絕小不殄微也行自微也不微人人知之則願也人不知苟吾自知也君子終身守此勿勿也君子見利思辱見惡思詬嗜慾思耻忿怒思患君子終身守此戰戰也

君子有此四守者以守其宗廟則保家之令主也使已無微過則易使人無微過則難身免於患而後可以圖國家之憂子言之外寬而內直自設於隱括之中直已而不直人以善存亡汲汲蓋蘧伯玉之行也蘧伯玉未至於為治也然亦可以為孝矣

曾子曰君子慮勝氣思而後動論而後行行

必思言之言必思復之復之必思無悔亦可謂慎矣人信其言從之以行人信其行從之

以復復宜其顛顛宜其年亦可謂外內合矣

君子之言信於家則行信於國家國之言行各以顛合易曰父父子子兄弟第第夫夫婦婦詩曰其顛維何室家之壺君子萬年承錫祚胤是衛武公之行也衛武公為周卿士九十矣而猶以言行自抑子貢曰獨居思仁公言言義三復白圭是南宮縚之行也夫子信其仁以為異姓則謂南宮縚錫顛者乎

曾子曰君子已善亦樂人之善也已能亦樂人之能也已雖不能亦不以援人君子好人

之爲善而弗趣也惡人之爲不善而弗疾也
君子不先人以惡不疑人以不信不說人之
過成人之美義則有常善則有隣苟有德焉
不求盈於人君子不絕人之歡不盡人之禮
來者不豫往者不愼去之不謗就之不賂亦
可謂忠矣君子恭而不難安而不舒遜而不
諂寬而不縱惠而不儉直而不徑亦可謂知
矣

君子不如是則其言行有擇有擇則有過
有過則怨惡莫之免也夫其爲道已多矣

爲忠莫如恕爲知莫如愼能恕以愼又何
多救之有乎子貢曰高柴執親之喪夫子
以爲難能也開蟄不殺則天道也方長不
拆則恕也恕則仁也湯敬以恕故日躋夫
有日躋之君子以爲公卿不亦可乎

曾子曰君子亂言弗殖神言弗致也衆信弗
主靈言弗與人言不信不和唱流言不拆
辭不陳人以所能言必有主行必有法親人
必有方多知而無親博學而無方好多而無
定者君子弗與也君子多知而擇焉博學而
算焉多言而慎焉博學而無行進給而不讓

好直而徑儉而好宦者君子弗與也夸而無
耻疆而無憚好勇而忍人者君子弗與也亟
達而無守好名而無體忿怒而爲惡足恭而
口聖而無常位巧言令色能小行而篤君子
弗與也

夫是則君子多所弗與者矣多所弗與而
免於怨惡者何也多與則多累多累則多
旤言行滿於天下尤悔亦滿於天下君子
有擇於人而後無擇於身詩曰薄汚我私
薄澣我衣害澣害否蓋言擇也采采芣苢
薄言采之采采芣苢薄言有之言無擇也
甫刑曰敬忌而罔有擇言在躬夫非仲山
甫衛武公而能如此乎如仲山甫衛武公
之爲卿士則可與言考者矣

右傳十則

大傳九百八十一字
小傳一千二百五十三字

士章第五

資於事父以事毋而愛同資於事父以事君而
敬同故毋取其愛而君取其敬兼之者父也故
以孝事君則忠以敬事長則順忠順不失以事
其上然後能保其祿位而守其祭祀蓋士之孝
也

父則天也毋則地也君則日也受氣於天
受形於地取精於日此三者人之所繇生

也地亦受氣於天日亦取精於天此二者
 人之所原始反本也故事君事母皆資於
 父履地就日皆資於天二資者學問所繇
 始也子曰厚於仁者薄於義親而不尊厚
 於義者薄於仁尊而不親毋親而不尊君
 尊而不親以父教愛而親毋之愛及於天
 下以父教敬而尊君之敬及於天下故父
 者人之師也教愛教敬教忠教順皆於父
 焉取之因父以及師因師以及長愛敬忠
 順不出於家而行著於天下周公曰文王
 我師也周公豈欺我哉

詩云夙興夜寐無忝爾所生

蓋言學也孝不待學而非學則無以孝無
 以孝亦無以教也記曰發慮憲求善良足
 以諷聞不足以動眾就賢體遠足以動眾
 未足以化民君子如欲化民成俗其必繇

學乎夙興夜寐蓋言學也非學為從政而
 已也

右經第五章凡八十四字
小傳二百八十三字

大傳第五

記曰為人子者三賜不及車馬故州閭鄉黨
 稱其孝也兄弟親戚稱其慈也僚友稱其弟
 也執爨稱其仁也交游稱其信也見父之執
 不謂之進不敢進不謂之退不敢退不問不
 敢對此孝子之行也

凡昏冠之禮皆始於土故資愛資敬則工
 其始也為土者其莊矣而有油油之心焉

守親之業拜君之賜六行之中無取於義故獨以慈弟仁信聞

國君下齊牛式宗廟大夫士下公門式路馬乘路馬必朝服載鞭策不敢授綏左必式步路馬必中道以足感路馬芻有誅齒路馬有

誅

大夫士有同禮者而士加謹矣故大夫禮也松卿士也松大夫然則乘路馬何禮也謂五路之御也御必皆士矣朝服載鞭不敢授綏如其君在也如其君在則如其父在也蹴芻齒馬之有誅何也不敗君事者也敗君事者雖貴而猶誅之况路馬乎然且士未之敢也士必有其父士必有其兄士必有其大夫卿魯人之謠曰洳洳呼秋

乎攸乎深慮而淺謀邇身而遂志家臣而君圖是南蒯氏之行也

凡執玉器執輕如不克執玉器操幣圭璧則尚左手行不舉足車輪曳踵立則磬折垂珮

主佩倚則臣佩垂玉珮垂則臣佩委

執器者不皆士也而士從此知學矣是猶之跪屨榭袂之禮也然而已進矣晏子曰堂上之禮君行一則臣行二凡敬皆倍也不倍不順是晏平仲之行也

君使士射不能則辭以疾言曰某有負薪之憂侍於君子不顧問而對非禮也

士之始選於澤宮皆射也而曰不能何也負薪之憂有臂之疾也疾可以見於君而

不可以先長者父母之憂則君亦憂之故
辭非飾也所以廣孝也

君子行禮不求變俗祭祀之禮居喪之服哭

泣之位皆如其國之故謹脩其法而審行之

謂有先君卿大夫之治焉謂有宗老家相
之事焉是猶之負劍辟呵之禮也然而已
進矣然則禮失之俗如之何曰變則不正
正則不變變而正之是滕世子之行也

去國三世爵祿有郊於朝出入有詔於國若

兄弟宗族猶存則反告於宗後去國三世爵

祿無郊於朝出入無詔於國惟興之日從新

國之法

若是者河不忘親也不忘先也不保祿位
不守祭祀而猶有保祿位守祭祀之恩焉
道興而猶未忘廢也道廢而猶未忘興也
詩曰無逝我梁無發我笱亦資敬之意也

君子已孤不更名已孤暴貴不為父作謚

已孤則愛篤已貴則敬篤也已之名命於
親父之名易於君士而可以顯親雖韋布
猶之顯親也士而不可以顯親雖鍾鼎無
以殉死者然則上祀追王何也曰是王者
之禮也王者繼嗣不得用開創者之禮故
有身為王者不禰其父者矣而况於士乎
而况於暴貴者乎然則身為王者不禰其
父禮乎曰已過於禮也然有禮意存焉

君子將營宮室宗廟為先廡庫為次居室為

後凡家造祭器為先犧賦為次養器為後無

田祿者不設祭器有田祿者先爲祭服君子
雖貧不粥祭器雖寒不衣祭服爲宮室不斬
於丘木

國君去其國止之曰柰何去社稷也大夫
曰柰何去宗廟也士曰柰何去墳墓也國
君死社稷大夫死衆士死制故爲國君愛
敬其社稷爲大夫愛敬其宗廟爲士愛敬
其墳墓則災害不生而亂不作矣然則
士值危國如之何曰忠順不失未至於死
亡也未至於死何失忠順之有孟子曰
無罪而殺士則大夫可以去無罪而戮民
則上可以徙士患失其忠順不患其失祿
位士患失其祿位則不足以爲士矣

大夫士去國祭器不踰竟大夫寓祭器於大

夫士寓祭器於士大夫去國踰竟爲壇位鄉
國而哭素衣素裳素冠徹緣鞮屨素箠乘髦
馬不蚤鬣不祭食不說人以無罪婦人不當
御三月而後復

若是乎喪祿位失祭祀之重也故保祿位
守祭祀亦聖人之所貴也孟子曰士之失
位也猶諸侯之失國家也禮曰諸侯耕助
以饋粢盛夫人蠶繅以爲衣服犧牲不成
粢盛不潔衣服不備不敢以祭惟士無田
則亦不敢以祭牲殺器皿衣服不備不敢以祭
則不敢以宴不亦足弔乎是亦父母之所
弔也

天子視不上於祿不下於帶國君綏視大夫

衡視士視五步凡視上於面則敖下於帶則
憂傾則奸

單襄公曰目以處義足以步目目體不相
從何以能久故視者精神之治也愛敬存
於中則奸傲去於面矣黃目彘之貴者也
使衡而綏照於五步之內故以坐則知起
問則知對酬則知辭也是士為公尸神而
明之之道也

君命大夫與士肄在官言官在府言府在庫
言庫在朝言朝朝言不及犬馬輟朝而顧不
有異事必有異慮故輟朝而顧君子謂之固
在朝言禮問禮對以禮

固者不足以語禮故亦謂之瞽也士與大
夫肄則讓於大夫與卿肄則讓於卿愛敬
之發猶近於不學慮者也而何異慮之有
乎

凡士相見贄冬用雉夏用牯左肱奉之以侷
請見主人凡三辭見三辭贄不獲乃見之既
見賓交拜送贄出賓再燕見主人三還贄曰
既得見矣不獲乃受之士見於大夫終辭其
贄於其人也一拜其辱也賓退送再拜若常
為臣者則禮辭其贄曰某也辭不得命不敢
固辭賓入奠贄再拜主答一拜賓出凡三還

贄賓受而去之下大夫相見以鴈上大夫相見以羔其見於君也不還贄以彌慙為度

士相見之受贄為還拜也見大夫之不受贄謂不還拜也受贄而不還拜唯君而已士以君事其大夫則已過然猶不失為忠順也周霄問於孟子曰士出疆必載贄何也曰士之仕也猶農夫之耕也農夫豈為出疆舍其耒耜哉曰晉國亦仕國也未聞仕如此其急仕如此其急君子之難仕何也曰丈夫生而願為之有室女子生而願為之有家父母之心人皆有之不待父母之命媒妁之言鑽穴隙相窺踰牆相從則父母國人皆賤之矣古之人未嘗不欲仕也又惡不繇其道不繇其道而往者與鑽穴隙之類也體父母之意以道稱仕其惟儒者乎

子貢問士子曰行已有恥使於四方不辱君命可為士矣敢問其次子曰宗族稱孝焉鄉

黨稱弟焉

孝弟其猶有恥辱與其行已未篤與愛其身不辱其父兄守其宮庭不出四方得其始端而遺其中終是士祥劉殷之行也曰王劉之才及於四方矣而訾之何也曰是猶未免於恥辱也穎考叔之挾軫不如曹沫之反地也故遠於恥辱之難也

王子墊問曰士何事孟子曰尚志何謂尚志

曰仁義而已矣殺一無罪非仁也非其有而取之非義也居惡在仁是也路惡在義是也

居仁繇義大人之事備矣

殺草木六畜非其時孝子不為也食非仁人之粟孝子不為也仁義之於孝弟非兩也故曰堯舜之道孝弟而已矣

曾子曰君子不貴興道之士而貴有耻之士也若繇富貴興道者與貧賤吾恐其或失也若繇貧賤興道者與富貴吾恐其羸驕也有耻之士富不以道則耻之貴不以道則耻之貧賤不以道則非吾耻也執仁與義而行之未篤故也夫婦會於牆陰明日或揚其言矣

胡為其莫之聞也

甚矣曾子之言似夫子也興道之士柔行似仁強言似義多聞似博歛機似約深息似靜鈎名似正與時好一惡似忠似順然其意不過以為富貴也而人主以為興道使去其富貴而反於貧賤則一無耻之士而已無耻之士不足與於仁義則不足與於禮樂而曰以才興道吾不信也

子言之儒有難得而易祿也易祿而難畜也非時不見不亦難得乎非義不合不亦難畜乎先勞而後祿不亦易祿乎其近人有如此者

孝子不絕人亦不自絕也
 名仁義之粟則受之言行可以自見則見
 矣惡慢人而食其食則孝子不為也夫子
 之稱子羽也曰貴之不喜賤之不怒苟利
 於民廉於事上以佐其行也
 不為也是澹臺滅明之行也

子言之儒有居處齊難坐起恭敬言必先信

行必忠正道塗不爭險易之利冬夏不爭陰

陽之和愛其死以有待也養其身以有為也

其備豫有如此者

養其親則敬其身敬其
 有不死於其名臣有不
 死則死之不以道死則
 當門而處雖有暴政不
 身則愛其死故道
 死於其君君以道
 不死也中道而止
 更其所是安平仲

之行也

子言之儒有今人與居古人與稽今世行之

後世以為楷適弗逢世上弗援下弗推讒諂

之民有比黨而危之者身可危也而志不可

奪也雖危起居竟信其志猶將不忘百姓之

病也其憂思有如此者

危其身以伸其志孝子亦豈為之乎立行
 之士不諧於時固其所也匹夫納溝哲人
 所傷以身之危易百姓之病孝子猶且為
 之曾子曰士不可以不
 仁以為己任不亦重乎
 死而後已不亦遠
 乎是曾子之志也

子言之儒有內稱不辟親外舉不辟怨程功積事推賢而進達之不望其報君得其志苟利國家不求富貴其舉賢援能有如此者

若此則可謂敬愛者矣孝子事親就養無方忠臣事君就養無方以無方之賢就無方之養卿大夫之為也士為之則已上然且有為之者鮮或比黨而危之不疑也是和侯羊舌盼之行也會子曰可以託六尺之孤可以寄百里之命臨大節而不可奪也天下有道則亦卿大夫之選也

子言之儒有澡身而浴德陳言而伏靜而正之上弗知也麤而翹之又_不急為也_不臨深

而為高不加少而為多世治不輕世亂不沮

同弗與異弗非也其特立獨行有如此者

若此則可謂忠順者矣以此之為而猶為祭祀祿位者乎儒行所言自立者五強學力行一也見苑不更二也戴仁抱義三也雖危竟伸四也推賢忘報五也而陳伏靜正者猶為特獨故聖人所言忠順非世之所謂忠順者也世之所為忠順者猶資愛於其保姆也

子言之儒有上不臣天子下不事諸侯慎靜

而尚寬強毅以與人博學以知服近文章砥

礪廉隅雖分國如錙銖不臣不仕其規為有

如此者

不臣不事可以為士亦可以為孝子乎士
有尊於諸侯士有貴於卿大夫立身行道
則其白與也曾子曰宮中雍雍外焉肅肅
朋爰切切兄弟怡怡遠者以貌近者以情
立其所能遠其所不能無失所守亦可以
終身也孟子曰居仁繇義大人之事備矣
夫孝子之於天下何不備之有孝子而必
資祿以為祭資位以為祀則卿大夫而下
無孝子也子言之德恭而行信終日言不
在尤之內貧而樂卑而尊是老萊子之行
也易行以俟命居下位不援其上觀於四
方不忘其親苟思其親不盡其樂以不能
學為終身之憂是介山之推之行也故如
介山之推則可以語學者矣

右傳二十則

大傳二千二百七十一字
小傳二千一百三十一字

庶人章第六

用天之道分地之利謹身節用以養父母此庶

人之孝也

君子資於天地得其尊親小人資於天地
得其樂利小人資其力君子資其志君子
致其禮小人致其事其要於敬養不敢毀
傷則一也然則君子不言養小人不敬
何也顯親揚名則養也謹身節用則敬也
君子之有廟祀小人之有畝澮大小殊致
有身則一愛敬忠順與為謹節何以異乎
謹節則不傷不傷則不毀不傷不毀則言
行皆滿於天下言行皆滿於天下則皆可
配於天地矣然則夫子與庶人微其詞何
也曰庶人明於人非明於人也則於人非
則人者也至德要道不之總也故此之此

之者微之也謂夫士君子而尚庶人之事者也庶人之於卿士猶諸侯之於天子也故自天子至於庶人孝無終始而患不及者未之有也

不敢毀傷孝之始也立身顯親孝之終也謹身以事親則有始立身以事親則有終孝有終始則道者於天下行立於百世敬愛其身而惡慢綽之小則毀傷其身大則毀傷天下曾子曰既患繇生自纖纖也君子夙絕之夙絕之如何曰敬而已矣君子未有不敬而免於患者也

右經第六章

凡四十三字
小傳三百三十字

大傳第六

子云小人皆能養其親不敬何以辨父子不

同位以尊敬也書云辟不辟忝厥祖

子不乘父父不乘祖所以著辨也子不忝父父不忝祖所以終始也不能立身不能率祖而曰能養小人之義也故無念爾祖聿修厥德者始孝之事夙興夜寐無忝爾所生者終孝之事也

曾子曰孝有三大孝不匱中孝用勞小孝用力博施備物可謂不匱矣尊仁安義可謂用勞矣慈愛忘勞可謂用力矣

尊仁安義何勞之有言夫為仁義而不備物者也不備物則備力父母有憂之然而

無患人之患富貴有甚於患筋力者也曾子曰仁者始恭者不入慎者不使正直者邇於刑弗違則始於罪君子踏在高山之上深澤之汗聚橡栗藜藿而食之生耕稼以老十室之邑夫其父之志也夫亦其子之志也夫

子游問孝子曰今之孝者是謂能養至於犬

馬皆能有養不敬何以別乎

大祀之尚明水也大享之尚太羹也兩者非以為養也君子之敬父母尊於天地明於日月道塞而反於隴畝亦猶有郊社之意焉馬之煦沫雖報不享又何傲焉曾子曰烹熟羶香嘗而進之非孝也養也

子夏問孝子曰色難有事弟子服其勞有酒

食先生饌曾是以為孝乎

記曰孝子之有深愛者必有和氣有和氣者必有愉色有愉色者必有婉容嚴威儼恪非所以事親也然則敬者無儼恪與曰敬之有儼恪自享祀始也養從愛始者也孝經之道有三曰嚴曰順曰敬嚴從父也順從母也孝養之義從母者也然則是獨從愛乎曰愛至而敬亦至敬至而色亦至矣參損游夏皆孝也用之不同曾卜致敬言閔致和和者敬之通也

曾子曰民之本教曰孝其行之曰養養可能

也安為難安可能也久為難久可能也卒為

難卒事慎行則可謂能終也

若是則曾子自為能養也曾子擇孝取下
 焉而猶以為難則是庶人之孝未為降也
 孟子曰曾子養曾皙必有酒肉將徹必請
 所與問有餘必曰有曾皙死曾元養曾子
 必有酒肉將徹不請所與問有餘曰也矣
 將以復進也此所謂養口體者也若曾子
 則可謂養志也故敬之降為養養之下無
 降焉保祿祀而下則亦無降也故孝子之
 詩至松苞楸而衰矣周書曰嗣爾股肱純
 其藝黍稷奔走事厥考厥長肇牽牛車遠
 服賈用孝養厥父母厥父母慶自洗腆致
 用酒則洵矣其庶人之義也

子言之君子反古復始不忘其所繇生也是
 以致其敬發其情竭力從事以報其親不敢
 弗盡也

身生於父成於君始於祖本於天地知其
 所繇生則知其所繇成知其所繇成則知其
 竭力以行禮樂諸侯竭力以行政教其明
 報不同而發情致敬竭力從事則一也詩
 曰我孔熯矣式禮莫愆又曰靡有不孝自
 求伊祜故謂小孝用力用力之不及致敬
 者亦有未盡也
 子路見於夫子曰有人於此夙興夜寐手
 足胼胝面有黧黑藝五穀以事其親而無
 孝子之名者何也子曰意者身未敬耶色
 不順耶辭不遜耶古人有言曰衣與食與
 何以無孝之名意者所及非仁人耶坐吾
 語女雖有國士之力不能自舉其身君子
 愛以事親敬以及賢何為無孝子之名乎
 詩曰朋爰攸攝攝以威儀曾子則嘗從事
 於此也夫事親信及獲上治民君子亦嘗
 置力於此也

曾子曰君子進則能達退則能靜豈貴其能
達哉貴其有功也豈貴其能靜哉貴其能守
也夫惟進之何功退之何守故君子有二觀
焉君子進則益上之譽損下之憂不得志不
安貴位不博厚祿負耜而行道凍餓而守仁
是君子之功守也

故祿養者非君子之得已也猶不得於道
而得於歛歛之義也君子動靜以爲立身
進退以爲終始有不功之功不利之利曾
子言之往而不可還者親也至而不可待
者年也吾嘗仕齊祿不過鐘釜欣欣而喜
非爲貴也親歛之後南游於楚懷題三圍

轉轂百乘比鄉涕泣非爲賤也君子有後
名不害斯夕之養故顯名揚親亦非君子
之得已也以爲不得已而不敢自已是終
始之義也

曾子曰人之生也百歲之中有疾病焉有老
幼焉君子思其不復者而先施焉親戚既歿
雖欲孝誰爲孝年既耆艾雖欲弟誰爲弟故
孝有不及弟有不時慎始思終其是之謂與

甚矣曾子之仁也不及孝而思孝不及弟
而思弟人之性也耄耋而思立身毀敗而
思行道則亦晚矣君子慎始而慮終孩提
立孝老死而不倦詩曰我日斯邁而月斯
征昔者子夏食於曾子曰是不已費乎曾
子曰君子有三費飲食不在其中有樂

琴瑟不在其中子夏曰何為三樂曰有親
 可畏有君可事有子可遺此一樂也有親
 可諫有君可去有子可怒此二樂也有親
 可養有君可諭有友可助此三樂也何為
 三費曰少而學之長而忘之此一費也事
 君有功而輕負之此二費也久與之交而
 中絕之此三費也夫孩提行孝老而不就
 立身耆艾而猶有咎其為費也不亦多乎
 詩曰天生蒸民其命靡諶靡不有初鮮克
 有終言性習之中變而仁孝之不易也

曾子曰先憂事者後樂事先樂事者後憂事

昔者天子日旦思其四海之內戰戰惟恐不
 能又諸侯日旦思其四封之內戰戰惟恐失
 損之大夫士日旦思其官職戰戰惟恐不勝

庶人日旦思其事戰戰惟恐刑罰之至也故

臨事而栗者鮮不濟矣

故臨深履薄天子庶人之所其學也愛敬
 之心不勝惡慢始事而勤終事而怠自謂
 無所毀傷而毀傷者驟至矣丹書曰敬勝
 怠者吉怠勝敬者滅義勝欲者從欲勝義
 者凶夫為人子行孝而至無終始非以欲
 勝義而然乎勝義滅仁既患乃成孟子曰
 君子有終身之憂無一朝之患也乃若所
 憂則有之舜人也我亦人也舜為法於天
 下可傳於後世我猶未免為鄉人也是則
 可憂也憂之如何如舜而已若夫君子所
 患則無矣非仁無為也非禮無行也如有
 一朝之患則君子不患矣

子言之仁有數義有長短大小中心懔懼愛

孝經傳 卷一
人之仁也率法而強之資仁者也詩云豐水
有芑武王豈不仕詒厥孫謀以燕翼子數世
之仁也國風曰我躬不闕皇恤我後終身之
仁也

夫世豈有仁而終身者乎亦豈有不仁而
終其身者乎以敬成孝以孝成仁能終其
身則能及於百世矣亦何長短大小之有
州書曰凡事不強則枉弗敬則不正枉者
滅廢敬者萬世師尚文曰且臣聞之以仁
得之以仁守之其量百世以不仁得之以
仁守之其量十世以不仁得之以不仁守
之必及其世孟子謂是尚父之言未是也
不仁而可以得天下則是不孝而可以奉
宗祀也孟子曰天子不仁不保四海諸侯

不仁不保社稷卿大夫不仁不保宗廟士
庶人不仁不保四體夫能行愛敬終始其
身則可謂仁者矣豐芑之詩何多讓焉

子曰中心安仁者天下一人而已大雅曰德
輶如毛民鮮克舉之我儀圖之維仲山甫舉
之愛莫助之子曰詩之好仁如此鄉道而行
中道而廢忘身之老也不知年數之不足也
俛焉日有孳孳斃而後已

若是則可謂有終始者矣仲山甫之稱爲
仁何也謂有終始也令儀令色小心翼翼
文王之事也不畏彊禦不侮矜寡成湯之
智也以保其身王躬是保舜禹之義也有

是三者以率民彝以正物則性立而教著
於天下則非獨立身而已也孟子曰吾身
不能居仁繇義謂之自暴也又曰謂其君
不能者賊其君者也鄉道而行中道而廢
則亦命也以爲朝夕不放於日月則君子
有所不可也

大學曰自天子以至於庶人壹是皆以修身
爲本其本亂而未治者否矣其所尊者薄而
其所薄者尊未之有也

五孝雖殊敬身一也敬身則敬親敬親則
敬天敬天則成親成親則成身成身而其
身大於天下矣孟子曰人有恆言皆曰天
下國家天下之本在國國之本在家家之
本在身身尊則萬物皆尊身治則萬物皆
治身毀則萬物皆毀身傷則萬物皆傷矣

虞書曰敬修其可願又曰慎厥身修思永
夫非愛敬終始而能如此乎

右傳十二則 大傳六百五十八字
小傳一千九百二十七字

大學曰自天子以至於庶人皆以修其身而後家齊國治天下平其本其末亂而未治者否矣其所存者薄而其所廢者厚未之有也

本數十二

小數一千六百二十一字

夫非愛道益故而始成也乎
數書曰始於其四應又曰前測良於思亦

